

**Kemenangan BN Pastikan Kesenambungan Transformasi Pengangkutan Awam - MRT Corp
Bernama
13 Mei, 2013**

KUALA LUMPUR, 13 Mei (Bernama) -- Mandat baharu yang diperoleh Barisan Nasional (BN) pada pilihan raya umum ke-13 lalu akan memastikan kesinambungan program transformasi kerajaan bagi mencapai status negara maju pada 2020.

Ketua Pegawai Eksekutif Mass Rapid Transit Corporation Sdn Bhd (MRT Corp) Datuk Azhar Abdul Hamid berkata kini kerajaan BN dapat menumpukan kepada usaha meningkatkan ekonomi negara, terutama menyiapkan infrastruktur utama seperti pengangkutan awam bandar yang merupakan antara Bidang Keberhasilan Utama Negara.

"Memandangkan pilihan raya telah berakhir, fokus kini boleh ditumpukan kepada pelaksanaan infrastruktur utama itu yang akan memberi manfaat kepada jutaan rakyat di Lembah Klang," katanya dalam kenyataan di sini hari ini.

Menurutnya projek Klang Valley Mass Rapid Transit (KVMRT) yang merupakan antara usaha ke arah itu, berjalan lancar dan setakat ini berada pada tahap 14 peratus.

"Pada Disember lalu projek siap 3 peratus dan meningkat kepada 7 peratus pada Mac lepas dan sekarang 14 peratus. Pencapaian baik ini adalah hasil kerjasama semua agensi dan jabatan kerajaan bagi memastikan projek siap pada masanya," katanya.

Menurutnya dengan mandat baharu yang diperoleh BN, projek KVMRT akan dapat disiapkan mengikut jadual dan fasa Sungai Buloh-Kajang diyakini dapat beroperasi pada Julai 2017.

KVMRT dijangka dapat memberi manfaat kepada 1.2 juta penduduk di sekitar Lembah Klang dengan sasaran 400,000 penumpang setiap hari, katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=949258>